

1 Yon

Yon belen hanƙapya asan gago kayyin

Mere forok yenbe Al Kurun dilingde al gergen yiryin

¹ Be, asan gabe al kura Al Kurunyen Mere inen hanyen al goke kayen tihim. Al gobe alya bereya megen han kurun gayen Al Kurun dilingde gergen yird yird al. Yenbe megenya nanƙinya, irde det kurun gayen forok ma yekeya hinhin. Nenbe al gore mere tike nurde hinheth, dilyniningde kenen hinheth. Irde mata ten hike kenen hinheth, irdeb hanniningde wor po sasan urde nurde hinheth.

² Alya bereya Al Kurun dilingde gergen yird yird al goyen Al Kurun belen ten kawan irke tumnan ala kenen hinheth. Irdeb yen ge tagalde hityen. Yenbe alya bereya goyen Al kurunya hen hen gote min al. Al gobe Al Kurunya momnonde hitin al. Al Kurun belen dilyniningde kawan irke kintirin goyen goke gago momon dirde hite.

³ Nenbe al goyen kenen hinheth, irde meremin nurde hinheth kurun goyen momon dirde hite. Gogab den wor yen ge dufaytin taren irkeb nenya tumnan awalikde hitek. Irdeb denya nenya tumnan Al Kurunya Urmin Yesu Kristuya irde awalikde hitek.

⁴ Ningeb asan ga kan hite gabe den wor bebaƙ ten Yesu nin dufaytin sanin irkeb denya nenya tumnan aman hetek yenbe gago kan hite.

Al Kurunj dilingde wukken hen yenya awalikde hitek

⁵ Be, saba Yesu belen dirke nurtin goyen gago momon dirnin tihit. Mereminbe gahade: Al Kurunbe hulsi yara wukken wor po, mata bulun minmon. Mata bulunyen kidoma goyen dirnen mun kura yen hitte ma hi.

⁶ Ningeb nen gayen Al Kurunya awalikde hite yen hitek gega, kidoma bana hitek gobe usi ten hitek, irde Al Kurunyen mere fudinde goyen ma gama irde hitek.

⁷ Goyenpoga nen gayen Al Kurun hulsi yara wukken wor po hi gwahade goyen hen mata igin po ten hitekbe fudinde wor po nenbe kadrininnya awalikde po hitek. Irdeb Yesu nen ge ten darim wok irde kamyin goke ten Al Kurun belen mata buluninin halde dunke wukkek wor po hitek.

⁸ Be, nen gayen mata buluninin minmon, nenbe huwak hite yen hitek gobe nindiken usi wor po irde hitek. Gwahade yen hitek gobe Al Kurunyen mere fudinde goyen binininde ma hiekb gogo gwaha yen hitek.

⁹ Munan nen gayen mata buluninin goke Al Kurun pohogay irde hitekbe yen belen halde dunyen. Irde yen dilingde mata huwak mon goyen yad sin yirde wukkek diryen. Yenbe gwaha tiyen yirin gobe fudinde wor po gwaha tiyyen, irde mata huwak po ten hiyen al geb, gogo mata buluninin halde dunen wukkek diryen.

¹⁰ Be, Al Kurunbe al gwahade geb, nen gayen mata bulun ma po ten hityen yetek gobe Al Kurunbe usi al intek. Gwaha ten hitekbe meremin goyen epte ma binininde hiyen.

2

Yesu Kristu belen faran durde hi

¹ Ningeb, dirin ne yago, asan gabe mata bulun ma ten hinayin yen gago kan hime. Goyenbe kurare son hen mata bulun titekbe mata buluninin halde dunen dunen nin Adoninin Al Kurun gusunan irtek al kura hi. Yenbe Yesu Kristu, Al Huwak wor po.

² Yenbe mata buluninin Al Kurun belen halde dunwon yen nurdeb nen ge ten kamyin. Kamyin gobe nen ge po mon, alya bereya kurun megen ga hike kwa goyen goke manan kamyin.

Al Kurun nurd unen han marbe meremin gama irde han

³ Be, nenbe Al Kurun belen gwaha gwaha ten hinayin diti goyen ten hitekbe fudinde Al Kurun nurde unen hite yen nurde hitek.

⁴ Goyenbe al kura belen, “Nebe Al Kurun kenkela nurde unen hime,” yiyyen gega, mata gwaha gwaha ten hinayin yitin goyen ma ten hiyen al gobe usi al. Al gobe Al Kurunyen mere fudinde goyen binde ma hiyen geb, gogo gwaha ten hiyen.

⁵ Munan al kura Al Kurunyen mere gama irde hiyen al gobe fudinde wor po Al Kurun nin amanen nurde hiyen geb, gogo gwaha ten hiyen. Nenbe mata gwahade ten hitek gab fudinde Al Kurunya hite yen bebak ten hitek.

⁶ Ningeb al kura, “Nebe Al Kurunya har,” yiyyen al gobe Yesu belen mata igin ten hinhin gwahade po ten hiyen.

⁷ Be, kadne yago, nebe saba gergen kura ma kan dunen hime. Hanƙapya ne belen saba dirmeke nuramin goyen po sopte kan dunen tihim.

⁸ Goyenbe saba gobe hanƙa saba diren tihim goya tunande. Saba gote iginen fudindebe Yesu belen mata ten hinhin bana gon mat kawan forok yen hinhin. Irde matatinde wor kawan forok yen hi. Gwaha ten hi gobe kidomare nin mata bulunbe hubu hen hikeb hulsire nin mata igin fudinde goyen bikken kawan hen kurun hen hi geb, gogo gwaha ten hi.

⁹ Nin geb al kura, “Nebe hulsire hime,” yen hi gega, kadom kura goke igin ma nurde haram irde hi al gobe kidoma bana po hi.

¹⁰ Munan al kura kadom nin amanen nurde hi al gobe hulsire hi. Irkeb dufay bulun kura binde ma hi geb, epte ma son hen mata bulunde katyen.

¹¹ Goyenbe al kura kadom kura goke igin ma nurde haram irde hi al gobe mata bulunyen kidoma bana po hen gor nin mata po ten hi. Al gobe mata bulunyen kidoma bana hi geb, kidoma gore dilin pet tike belen ma kenen kun hiyen go gwahade goyen po, mata bulun po ten hi.

¹² Den dirinbe Yesu Kristu belen mata tiyyin goke ten Al Kurun belen mata buluntin halde duntin han geb, gago asan kan dunen hime.

¹³ Den salannenbe Yesu Kristu gwahader hitin al goyen nurde unen han geb, gago asan kan dunen hime.

Den al fonenbe Satan mata bulunde dukutek al goyen fole iran geb, gago asan kan dunen hime.

¹⁴ Denj dirinbe Adoninin nurd unen han geb, gago asan kan dunen hime.

Den salannenbe Al Kurun gwahader hitin al goyen nurde unen han geb, gago asan kan dunen hime.

Den al fonenbe taren po Al Kurun nin hekken nurde han, irde meremin goyen bitin bana kerde gama irde han,
irde Satan mata bulunde dukutek al goyen fole iran geb, gago asan kan dunen hime.

Megen nin mata goke amanen ma nurnayin

¹⁵⁻¹⁶ Ningeb denbe megen nin marte mata bulunya dufay bulunya kurayen kurayen kurun goke amanen ma nurde hinayin. Mata megen nin mar belen ten hanyen gobe gahade: ulinde po aman hetek belen nin nankenen han, irde det kura kenen tetek po yen goke po nurde han, irde detminya mataminya goke yingen turun turun ten han gobe megen nin marte mata. Mata gwahade ten han kurun gobe Al Kurun hitte mat ma watin. Mata gobe megen gar nin po. Ningeb al kura megen nin marte mata bulun goke amanen nurde hi al gobe epte ma binde mat Adoninin ge amanen nuryen geb.

¹⁷ Megen nin marbe hubu henayin, irde mata bulun titek dufay go manan hubu hiyyen. Goyenbe Al Kurunyen dufay gama irde han marbe yenya huginen hinayin.

Yesu Kristu asogo irde han mar nin kenkela henan ko

¹⁸ Be, dirinne yago, nalu gayenterbe megen gayen hubu hetek gobe binde hen hi. Nalu funan

binde hekeb Yesuyen asogo wayyen yeke nurde hanjen gwahade po, asogominbe bikken budam forok yan. Ningeb go mar goyen yenenbe nalu funanbe binde hen hi yen bebak ten hite.

¹⁹ Mel gobe Yesu gama irhet irhet tikeb nenya tumnan hinhet gega, dubul diran. Mel gobe nenya tumnan hitek mon. Munan tumnan hitek manhan nenya awalikde hitewon. Goyenbe mel gobe nen dubul ten kun Yesu asogo irde han geb, matamin goreb, “Nenbe dende mon,” yen dikala dirde han.

²⁰ Denbe Yesu belen Holi Spirit duntin han geb, den tumnan mere daminbe Al Kurunyen mere fudinde goyen bebakken nurde han.

²¹ Ningeb asan kan hime gabe mere fudinde goyen ma nurde han yen gago asan kan dunen hime? Mon. Denbe mere fudindebe damin goyen nurde han, irde usi merebe saba fudinde goyenter mat ma forok yen hi yen nurde hime geb, asan gago kan dunen hime.

²² Ningeb denbe usi albe ganun yen nurde han? Usi al gobe, “Yesube Mesaia mon,” yen hi al gogo. Al gwahade gobe Yesu Kristuyen asogo wor po. Al goreb Al Kurunbe Yesu Kristu Nani, irde Yesu Kristube Al Kurun Urmin goyen fudinde yen ma nurde hi.

²³ Ningeb al kura Al Kurun Urmin pel irde han marbe Nani wor pel irde han. Munan al kura Al Kurun Urmin nurd unen han marbe Nani wor nurd unen han.

²⁴ Ningeb saba han kapya dirmeke nuramin gobe bitinde kerde kenkela po gama irde hinayin.

Gwaha ten hinayinbe Al Kurunya Urmin Yesuya irde hinayin.

²⁵ Irde gwaha ten han marbe Al Kurunya huginjen hinayin yen Yesu belen bina tiyyin goyen dunyen.

²⁶ Be, nebe mata bulunde katnayin yen bitin yawarnin kurut yen han mar goke hayhay dire yen asan gago kan dunen hime.

²⁷ Denbe Yesu belen Holi Spirit dunyin goyen den bana hi. Ningeb al kura belen epte ma saba dirtek han. Holi Spirit yingen belen daminbe fudinde goyen tumnan saba dirde hi. Irde sabaminbe fudinde usi mon geb, Holi Spirit belen dinen hiyen gwahade po, Yesu Kristuya po hinayin.

Nejbe Al Kurun dirnen wen

²⁸ Be, dirinne yago, huginjen yenya hinayin. Gogab yen mulgan hen megen gar wan wan nalureb kenen kenen nin kafura ma henayin, irde memya ma henayin.

²⁹ Denbe Yesu gob al huwak wor po yen nurde han kenem alya bereya Al Kurun dilinde mata huwak ten han mar gobe Al Kurun dirnen wen yen nurde hinayin.

3

¹ Fudinde wor po, Adonininbe nen gayen gake bubulkunne wor po yen nurde dunen hiyen. Irde gwahade nurde dunen hiyen gobe kurun wor po geb, dirinne wen dinen hiyen. Fudinde, nejbe yende dirnen wen! Goyenbe megen nin mar belen nejbe Al Kurunyen dirnen wen hitin goyen

bebak ma ten hanj. Mel gobe Al Kurun ma nurde unen hanj geb, gogo denenj bebak ma ten hanj.

² Kadne yago, nenbe Al Kurunyen dirnenj wenj. Gega gayenterbe kame dahade hetek gobe ma nurde hite. Goyenbe Yesu Kristu wake gab yenbe dahade hi goyen kenteke geb, nenj wor yenj yara hetek gobe nurde hite.

³ Ningeb al kura kame gwahade hitek yenj nurde goke doyanj hen hanj marbe Yesu gobe mata bulun minjon wukken hi gwahade po, mel goyen wor mata bulun ma ten Al Kurun dilinde wukken po hinayin.

⁴ Be, mata bulunbe Al Kurunyen saba pel ird ird mata. Ningeb al kura mata bulun tiyyen al gobe Al Kurunyen saba pel iryen.

⁵ Goyenbe Yesu belen nende mata bulun yad sinja yirenj yenj wayyin goyen denbe nurde hanj gogo. Fudinde, yenbe mata bulun minjon wor po.

⁶ Ningeb al kura yenya hanj marbe mata bulun ten teban ma ten hanjen. Munan al kura gwaha ten hanj marbe Yesube al gwahade yenj bebak ma ten hanj irde yenj ma nurde unen hanj mar.

⁷ Ningeb, dirinne yago, al hoyan belen mata bulunde dukunak geb, kenkela hen ga hinayin. Al kura mata huwak po ten hi al gobe Yesu Kristu al huwak gwahade goyen po, yenj wor Al Kurun dilindebe al huwak.

⁸ Munan Satan gobe megenya nanjinya ma forok yekeya mata bulun minj uryin al geb, al kura mata bulun ten hi al gobe Ungura gote dirin. Al Kurun Urminj megen gar katyin gobe Ungurayen meten bulun goyen isikame yenbe gogo katyin.

⁹ Ningeb al kura Al Kurunyen dirin hitin al gobe Naniinde dari igin goyen minyan hi geb, mata bulun kuyin kuyin ma ten hiyen. Al gobe Al Kurunyen dirin geb, epte ma gwaha ten hiyen.

¹⁰ Ningeb al kurate mata kenenbe al gobe Al Kurunyen dirin ma Ungurayen dirin goyen bebak ten hityen. Mata gobe gahade: al kura Al Kurun dilingde mata huwak mon goyen ten hi al gobe Al Kurunyen dirin mon, irde kadam nin amanen ma nurde hi al go wor Al Kurunyen dirin mon.

Kadtin yagoya kadam amanen nurd gunen ten hinayin

¹¹ Be, den belen han kapya wor po Yesu gama irde Al Kurunyen mere nuramin gobe gahade: kadinin yagoya kadam amanen nurde gunen ten hitek.

¹² Ningeb denbe Kein yara ma henayin. Yenbe Satan yufuk bana hinhin geb, kulin yende gogo mayke kamyin. Goyenbe da misinde kulin mayke kamyin? Gobe Al Kurun dilingde Keinyen matabe bulun wor po, muna kulindebe huwak geb, kulin nin igin ma nurdeb gogo mayke kamyin.

¹³ Ningeb, kadne yago, megen nin mar belen igin ma denen haram dirkeb goke hurkun kat ma tinayin.

¹⁴ Nenbe kadinin yago nin amanen nurd gunen ten hite. Ningeb kamde kamde taren goyen fole irde Al Kurunya huginen hitek yen nurde hite. Ningeb al kura kadam nin amanen ma nurde hi al gobe Al Kurunyen dilingde al kamtin hi.

¹⁵ Irde al kura kadom niñ igiñ ma nurde haram irde hi al gobe al gasa yirke kamde kamde al yara. Niñgeb al gwahade gobe epte ma Al Kurunya hugiñen hiriryen gobe nurde hañ gogo.

¹⁶ Munañ Yesu Kristube neñ ge teñ yingen ge ma nurde kamiñ. Niñgeb mata tiyyiñ goreb kadniniñ ge amanen nurtek belnen goyen dikala dirde hi. Goke teñbe neñ wor kadniniñ ge amanen nurdeb igiñ yen ge teñ kamtek.

¹⁷ Goyenbe al kura samuñ miñyañ gore kadom kura det niñ amu hen hi goyen kura kinyen gega, buniñen ma nurde unyenbe dahadem, “Nebe Al Kurun niñ amanen nurde unen hime,” yiyyen? Epte moñ.

¹⁸ Niñgeb, diriñne yago, mohonniñde mat po kadniniñ yagon amanen nurde yunen hite ma yen hitek. Gwaha titnenbe bininiñde mat fudinde wor po farañ yurde hitek.

¹⁹⁻²⁰ Gwaha titekbe nenbe Al Kurunyen mere fudinde goyen po gama irde hite yen nurtek. Munañ mata kurañ nurde buluñ titiñ yen bininiñde mat goke po kanduknen nurde hityen gobe dufayniñbe wukken moñ geb, gogo gwaha teñ hityen. Gega Al Kurunyen dufaybe nende folek, irde neñ ge kenkela wor po nurde hi geb, neñ belen kanduknen nurtek mata goke bearanen ma nurde dunen hiyen. Niñgeb Al Kurunya hen yenya mere teñ teñ niñ kafura ma hen hite gago.

²¹ Be, kadne yago, Al Kurunbe gwahade po mataniniñ ge mali ma dinen teñ hiyen. Niñgeb nenbe meremiñ po gama irde mataniniñ ge kanduknen ma nurdeb Al Kurunya mere teñ teñ niñ

kafura ma heñ hityen.

²² Irdeb det kuran nurde gusunan irde hityen kurun gobe tumnan dunen hiyen. Nenbe meremin po gama irde mata kura yen belen aman hetek goyen po ten hityen geb, gogo det kuran gusunan irtekeb det gobe tumnan dunen hiyen.

²³ Be, sabamin kurun gote min wor pobe gahade: Yesu Kristube Al Kurun Urmin gobe fudinde yen nurtek, irde Yesu belen yirin gwahade po, kadinin yagon amanen nurd gunen ten hitek.

²⁴ Al kura sabamin goyen gama irde mata ten han marbe yenya han, irke yen wor mel goya han. Munan Yesu nenya hite gobe Holi Spirit Al Kurun belen duntin gore bebak dirkeb nurde hite.

4

*Al Kurunyen mere basan mar falkuk nin kenkela
heñ hinan ko*

¹ Be, kadne yago, megen gabe Al Kurunyen mere basan mar porofet falkuk budam wor po han. Ningeb al kura wan, “Nebe Holi Spirit belen mere nunke gago tagalde hime,” yeke bemel ma yen ge hekken nurnayin. Gwaha titnenbe al go fudinde Holi Spirit belen mere irtin ma gwahade mon goyen kenkela kenen bebak ten hinayin.

² Ningeb al gote sababe fudinde Holi Spirit belen untin ma ungura belen untin goyen bebak ten ten gote belnenbe gahade: al kurat sabareb Yesu Kristube Al Kurun Urmin gega, al heñ megen

gar hinhin yekeb saba gobe fudinde Al Kurun belen untiŋ yeŋ nurnayiŋ.

³ Munan al kurat sabare Yesu niŋ gwaha mat ma tagalkeb al gote sababe Al Kurun hitte mat ma watiŋ yeŋ nurnayiŋ. Al gobe Yesu Kristuyen asogom gote saŋiŋde gwaha yeŋ hiyeŋ. Yesu Kristuyen asogom gobe wayyeŋ yeke nurde hanŋen gobe gogo bikkeŋ wayuŋ geb, megen gar hi.

⁴ Be, diriŋne yago, deŋbe Al Kurunŋen alya bereya. Irdeb Holi Spirit deŋ bana hi gote tareŋbe Satan megen niŋ mar basiŋa yirde Yesu Kristu asogo irde hi gote tareŋ fole irde hi geb, deŋ wor usi porofet goyen fole yirde hanŋen.

⁵ Porofet falkuk gobe megen niŋ mar. Niŋgeb megen niŋ marte dufay po gama irde saba tagalde hanŋen. Irkeb megen niŋ marbe fudinde yeŋ nurde hanŋen.

⁶ Goyenpoga neŋbe Al Kurunŋen alya bereya. Niŋgeb al kura Al Kurun nurd unen haŋ marbe saba tagaltekeb tumŋaŋ fudinde yeŋ nurde haŋ. Munan Al Kurun ma nurd unen haŋ marbe saba tagaltekeb usi yeŋ nurde haŋ. Niŋgeb mata gwaha tikeb al gobe Satanyen usi mere go minŋan ma Holi Spirityen mere fudinde go minŋan goyen yeneŋ bebak teŋ hityen.

Al Kurun niŋ amanen nurde ha kenem al hoyan niŋ wor amanen nurde hayiŋ

⁷ Be, kadne yago, neŋ belen kadininiŋ ge amanen nurd yunen yunen mata gobe Al Kurun belen duntiŋ. Irde al kura kadom niŋ amanen nurd yunen haŋ mar gobe Al Kurunŋen diriŋen

wen hitin geb, Al Kurun nurd unen han. Ningeb kadinin ge amanen nurd yunen hitek.

⁸ Al Kurunbe alya bereya amanen nurd yunen yunen gote min al. Ningeb al kura kadam nin amanen ma nurde yunen han marbe Al Kurun ma nurd unen han.

⁹ Al Kurun belen alya bereya goyen bubulkunne wor po yen nurde yunen hiyen gobe gaha mat dikala diryin: yenbe nen al megen nin gayen yenya huginen hitek yenbe Urmin unken mun goyen nen gake ten kamyen go yen nurdeb ten kerke megen gar katin.

¹⁰ Ningeb nen belen wa Al Kurun nin amanen nurde untirin mon. Nen belen gwaha irtinenbe yen belen po bubulkunne wor po yen nurde dunenbe mata buluninin halde dune yen Urmin ten kerke megen gar katen nen ge ten kamin. Ningeb gwaha diryin gobe al hoyan nin amanen nurd yunen yunen mata fudinde wor po.

¹¹ Ningeb, kadne yago, Al Kurun belen gwaha mat nen gayen bubulkunne wor po yen nurd dunen hi geb, nen wor kadinin ge amanen nurd yunen hitek.

¹² Al kura Al Kurun ma kintin gega, kadinin ge amanen nurde yunen hitekbe Al Kurunbe nenya hitek. Irde yen belen alya bereya nin amanen nurd yunen yunen gote iginenbe nen hitte kurun wor po forok yiyyen.

¹³ Be, Al Kurun belen Holi Spirit dunyin geb, Al Kurunbe nenya hike nen wor yenya hite goyen Holi Spirit belen gab bebak dirde hike nurde hityen.

¹⁴ Irdeb Al Kurun belen Urmin goyen alya bereya kurun gayen Yumulgan ten ten Al hewon yen ten kerke megen gar katiy hinhin goyen dilnininde kenen hinhet geb goke gago tagalde hite.

¹⁵ Ningeb al kura Yesube Al Kurun Urmin yen nurd unen han marbe Al Kurunbe yenya han, irke yen wor Al Kurunya han.

¹⁶ Ningeb Al Kurun belen nen gayen bubulkunne wor po yen nurde dunen hi yen nurdeb yen hitte po tawun hen hityen.

Gwahade ningeb Al Kurunbe alya bereya amanen nurde yunen yunen mata gote min al. Ningeb al kura kadam nin amanen nurde yunen yunen mata ten hi al gobe Al Kurunya har, irke Al Kurun wor al goya har.

¹⁷ Ningeb gwaha matbe Al Kurun belen alya bereya nin amanen nurd yunen hi mata gote iginenbe nen belen ga kawan forok irde pasi irtek. Gogab Yesu mata igin ten hinhin gwahade po, nen wor megen gar henya gwaha ten hitekbe kame yen belen wan al iginya bulunya pota yird yird nalureb merem yan ma diryen. Irkeb dilin mar huwartek goke kafura ma hetek.

¹⁸ Fudinde, al kura Al Kurun belen bubulkunne wor po yen nurd unen hi goyen bebak ten hiyen al gobe kafura dufay minmon hiyen. Gega al kura Al Kurun belen mata bulunmin goke merem yan yiryen yen nurde hiyen al gobe Al Kurun nin kafura hen hiyen. Go ten hiyen gobe Al Kurun belen bubulkunne wor po yen nurde yunen hi goyen igin wor po bulun kuram mon goyen kenkela bebak ma tenbe gogo kafura hen hiyen.

¹⁹ Al Kurun wa nen gayen bubulkunne wor po yen nurde duntin geb, nen wor yenya kadrinin yagoya nin amanen nurde yunen hite.

²⁰ Munan al kura, “Nebe Al Kurun nin amanen nurde unen hime,” yen hi gega, kadam nin amanen ma nurde haram irde hi al gobe usi al wor po. Al gobe kadam dilingde yenen hi goyen goke amanen ma nurde unen hi kenem Al Kurun epte ma kentek al gobe dahadem amanen nurde unen hiyen? Epte mon.

²¹ Ningeb Al Kurun belen saba kura dirtin gobe gahade: al kura belen Al Kurun nin amanen nurd unen hi kenem kadam nin wor amanen nurde unen hiyen.

5

Yesu nin dufaymin sanin irde han marte mata

¹ Be, al kura Yesu Kristube fudinde Mesaia yen nurde hi al gobe Al Kurunyen dirin. Nen megen nin albe al kura goke amanen nurde hityen kenem urmin ge wor amanen nurde unen hityen.

² Ningeb nenbe daha mat Al Kurunyen dirnen wen goke amanen nurde yunen hite yen nurtek? Gobe Al Kurun nin amanen nurde unen sabamin po gama irde hitek.

³⁻⁴ Fudinde wor po Al Kurun nin amanen nurde unen hityen kenem sabamin goyen kenkela gama irde mata ten hitek. Al Kurunyen dirnen wenbe megen nin marte mata bulun goyen igin pel irde fole irtek han geb, Al Kurunyen saba go gama irtek gobe metenen mon. Megen nin marte mata bulun goyen pel irde fole irde hityen gobe

dufayninin Yesu nin taren irde hite geb, gogo fole irde hityen.

⁵ Goyenbe ganun belen megen nin marte mata bulun goyen pel irde fole irde han? Al kura Yesube Al Kurun Urmin yen dufaymin yenge taren irde han mar gore po gab megen nin marte mata bulun fole irde han.

⁶ Be, al kura, “Fe baptais ten gab meten tiyen, irde darine wok irde kamen,” yen megen gar katyin al gobe Yesu Kristu. Yenbe fe baptais po tenbe meten tiyen yen ma wayyin. Darim wok irde kamde kamde nin manan wayyin. Yesu wan gwaha tiyyin goke tagalde hi al gobe Holi Spirit. Holi Spiritbe mere fudinde po ten hi gore goke tagalde hi.

⁷ Ningeb Yesu nin kenkela bebak titek detbe karwo gago:

⁸ Holi Spirit, irde Yon Baptais belen fe baptais iryin goyabe Yesu darim wok irde kamyinya gogo. Det karwo gobe al unken Yesu goke po yen han, hoyan nin ma yen han.

⁹ Al megen nin belen kadam nin tagalke fudinde yen nurde hityen. Goyenpoga Al Kurunyen merebe det kurun wor po, al megen ninde mere folek. Ningeb Al Kurun goreb Urmin goke momon dirde hiyen geb, fudinde wor po yen nurde hityen.

¹⁰ Ningeb al kura Al Kurun Urmin nin dufaymin sanin irde hi al gobe Al Kurun belen Urmin goke tagaltin gobe fudinde yen nurde hi. Munan al kura Al Kurun nin hekken ma nurde hi al gobe Al Kurun belen Urmin goke tagaltin goyen fudinde

yen ma nurde hi geb, Al Kurunbe usi al yen hi.

¹¹ Be, Al Kurun belen Urmin ge tagaltin gobe gahade: Al Kurun belenbe yingenya huginen hen hen goyen dunyin, irde huginen hen hen gote min albe Urmin.

¹² Ningeb al kura Urminya awalikde han gobe Al Kurunya huginen hen hen minyan. Munan al kura Al Kurun Urminya awalikde ma han gobe Al Kurunya huginen hen hen goyen minmon.

Nenbe Al Kurunya huginen hen hen goyenninin yan

¹³ Be, nebe den alya bereya Al Kurun Urmin goke dufaytin taren irtin han mar goyen Al Kurunya huginen hen hen matabe dende hitin goyen go nurwon yen asan gago kan dunen hime.

¹⁴ Nenbe Al Kurunyen dufay gama irde det kuran gusunan irtekeb gusunanninin huginen wol hen hiyen gobe nurde hite. Ningeb gwahade po diryen yen dufaynninin taren po kerdeya gusunan irde hite gago.

¹⁵ Irde det kuran gusunan irtek kurun goyen wol hen dunen hi yen nurde hite kenem gusunan irtek goyen tumnan yawartek yen nurde hite.

¹⁶⁻¹⁷ Ningeb al kura Yesuyen alya bereya kadam kura belen mata bulun kura tiyyen gega, mata bulun gobe Al Kurun belen igin halde untek kenenbe kadam goke Al Kurun gusunan iryen. Irkeb Al Kurun belen yenya huginen hen hen goyen go ma goran iryen. Al Kurun dilinde mata igin mon gobe tumnande mata bulun ala po. Al Kurunbe mata bulun igin halde yunyen gega, mata bulun kurabe epte ma halde yunyen. Ningeb mata bulun kura

Al Kurun belen igin halde yuntek mata titin mar goke po Al Kurun gusunan irnayin dinen hime. Fudinde, mata bulun kurabe Al Kurun belen epte ma halde yunyen geb, kame huginen kak alare hinayin. Ningeb kadtin kura gwaha ten hi al goke Al Kurun gusunan ma irnayin dinen hime.

¹⁸ Be, Al Kurun Urminbe al kura Al Kurunyen dirin hitin mar goyen kenkela doyan yirde hiyen geb, Satan belen epte ma bulun yiryen. Ningeb al gwahade gobe mata bulun ten teban ma ten han yen nurde hite.

¹⁹ Irde megen nin mar kurun gabe Ungurar yufukde han, munan nen Al Kurun nurd unen hite marbe Al Kurunyen dirnen wen yen nurde hite.

²⁰ Irde Al Kurun Urminbe nen gare Al Kurun nurde unen hinayin yen megen gar wan bebak diryin goyen wor nurde hite. Ningeb Al Kurunbe fudinde yen nurde hite. Fudinde, nenbe Al Kurunya hite. Irde Urmin Yesu Kristuya wor hite. Yesube Al Kurun fudinde wor po, irde Al Kurunya huginen hen hen gote min al.

²¹ Ningeb, dirinne yago, denbe megen nin mar belen Al Kurunninin yen det mali dolon yirde hanyen goyen yenen bebak tenbe yilwa yirde hinayin.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 18 Mar 2025 from source files dated 31 Aug 2023

dbba218f-41f3-5f08-b0b6-2a7c919093ab